

Na osnovu člana IV. 4.a) Ustava Bosne i Hercegovine, Parlamentarna skupština Bosne i Hercegovine, na sjednici Doma naroda održanoj 30. septembra 2004. godine, i sjednici Predstavničkog doma održanoj 12. oktobra 2004. godine, usvojila je

ZAKON

O IZMJENAMA I DOPUNAMA ZAKONA O PUTNIM ISPRAVAMA BOSNE I HERCEGOVINE

Član 1.

U Zakonu o putnim ispravama Bosne i Hercegovine ("Službeni glasnik BiH", br. 4/97, 1/99, 9/99, 27/00, 32/00, 19/01) član 1. mijenja se i glasi:

"Ovim zakonom propisuju se vrste, izgled, sadržaj putnih isprava Bosne i Hercegovine, organi nadležni za izdavanje putnih isprava, postupak izdavanja putnih isprava i centralna evidencija putnih isprava Bosne i Hercegovine".

Član 2.

U članu 5. iza stava 1. dodaje se stav 2. koji glasi:

"Pod uslovima propisanim bilateralnim sporazumima između Bosne i Hercegovine i druge države, državljani Bosne i Hercegovine mogu koristiti ličnu kartu za prelazak državne granice".

Član 3.

U članu 8. stav 3. briše se.

U članu 8. stav 4. tačka b) riječi: "Djeca mlađa od 16 godina čija su imena upisana u njega moraju biti u pratnji nosioca" zamjenjuju se riječima:

"Nosilac pasoša mlađi od 15 godina može putovati u inozemstvo samo u pratnji roditelja ili zakonskog zastupnika, odnosno mora imati saglasnost oba roditelja ili zakonskog zastupnika, odnosno staraoca, koju je ovjerio nadležni organ, ako putuje u pratnji druge osobe".

U članu 8. stav 4. u tački c) dodaje se nova rečenica, koja glasi:

"U slučajevima kada je nosilac pasoša maloljetna osoba predškolskog uzrasta, slijepa osoba ili osoba koja zbog fizičkih nedostataka nije u mogućnosti da se potpiše, pasoš je važeći i bez potpisa nosioca pasoša".

Član 4.

U članu 10. iza stava 4. dodaje se novi stav 5., koji glasi:

"Osobe upisane u zajednički pasoš moraju prilikom putovanja imati sa sobom ličnu kartu ili drugu ispravu kojom se dokazuje identitet, a vođa puta pasoš".

Dosadašnji stav 5. člana 10. postaje stav 6.

Član 5.

Član 11. briše se.

Član 6.

U članu 12. stav 2. mijenja se i glasi:

"Oblik i sadržaj putnog lista propisat će Ministarstvo civilnih poslova BiH".

Član 7.

U članu 15. stav 2. riječi: "Pasoš koji se izda u skladu s ovim stavom neće važiti duže od tri mjeseca" brišu se.

Član 8.

U članu 18. stav 3. iza tačke c) dodaje se nova tačka d), koja glasi:

"d) ako je jednom od roditelja, odlukom suda, dodijeljeno starateljstvo nad djetetom, osim u slučaju da istom odlukom suda izdavanje putne isprave i putovanje djeteta u inozemstvo nije uslovljeno saglasnošću oba roditelja".

Član 9.

U članu 19. stav 1. iza riječi "identitet", dodaju se riječi "i prebivalište".

U članu 19. stav 2. mijenja se i glasi:

"Uz zahtjev za izdavanje putne isprave prilaže se jedna fotografija koja vjerno prikazuje lik podnosioca zahtjeva i dokaz o plaćenju cijene putne isprave. U postupku izdavanja putnih isprava u Bosni i Hercegovini ne plaća se administrativna taksa".

U članu 19. stav 4. broj "15" zamjenjuje se brojem "30", a iza riječi "zahtjeva" briše se tačka i dodaje tekst: "osim kod rješavanja zahtjeva za izdavanje putnih isprava koji su podneseni diplomatskim ili konzularnim predstavništvima Bosne i Hercegovine, u kojem slučaju je rok za rješavanje zahtjeva 60 dana od dana podnošenja zahtjeva".

U članu 19. stav 5. broj "24" zamjenjuje se brojem "48".

Član 10.

Iza člana 19. dodaju se novi čl. 19a. i 19b. koji glase:

"Član 19a.

Nosilac putne isprave dužan je bez odgađanja prijaviti nestanak putne isprave ili njeno pronalaženje organu nadležnom za izdavanje putne isprave.

Nadležni organ će rješenjem proglasiti putnu ispravu nevažećom.

Protiv rješenja iz prethodnog stava žalba nije dopuštena.

Putna isprava proglašava se nevažećom u "Službenom glasniku BiH", službenim glasilima entiteta ili Brčko Distrikta Bosne i Hercegovine.

Član 19b.

Organ nadležan za izdavanje putne isprave će, na zahtjev nosioca putne isprave, izvršiti zamjenu putne isprave čiji rok nije istekao, ukoliko je popunjena, oštećena, uništena ili je došlo do promjene identifikacionih podataka nosioca putne isprave i izdati novu putnu ispravu".

Član 11.

U članu 21. stav 1. tačka 2. na kraju teksta briše se tačka i dodaju riječi: "na zahtjev nadležnog tužilaštva".

U članu 21. stav 1. tačka 3. na kraju teksta briše se tačka i dodaju riječi: "na zahtjev nadležnog suda".

U članu 21. stav 1. iza tačke 3. dodaje se nova tačka 4., koja glasi:

"4. ako je osnovana sumnja da će podnosilac zahtjeva izbjeći izvršenje dospjele imovinsko-pravne obaveze iz bračnog odnosa ili odnosa roditelja i djece, poresku obavezu ili drugu zakonom utvrđenu imovinsko-pravnu obavezu za koju postoji izvršni naslov - na zahtjev nadležnog suda".

U članu 21. iza stava 1. dodaje se novi stav 2., koji glasi:

"Zahtjev za izdavanje putnih isprava može se odbiti ako se osnovano sumnja da će podnosilac zahtjeva djelovati protivno propisima o zabrani ili ograničavanju uvoza ili izvoza, transporta ili raspačavanja opojnih sredstava ili protivno propisima iz oblasti carine, odnosno vanjske trgovine".

Dosadašnji stav 2. postaje stav 3.

U članu 21. dodaje se novi stav 4., koji glasi:

"Podatke iz stava 1. i 2., osim podataka iz stava 1. tačka 1. ovog člana, nadležni organi dužni su dostavljati redovno nadležnim organima za izdavanje putnih isprava. Organi nadležni za izdavanje putnih isprava o dostavljenim podacima, koji predstavljaju smetnju za izdavanje putnih isprava u smislu ovog člana, vode posebne evidencije i elektronskim putem ih evidentiraju u centralnu evidenciju putnih isprava".

Član 12.

U članu 23. stav 1. tačka d) iza riječi: "tač. 2. i 3." dodaju se riječi "tačke 4. te smetnja iz stava 2. člana 21. ovog zakona".

Član 13.

Iza člana 25. dodaju se novi čl. 25a., 25b. i 25c., koji glase:

"Član 25a.

Novčanom kaznom od 200 KM do 400 KM kaznit će se za prekršaj:

1. Ko putuje bez vize u zemlje za koje je viza potrebna (član 12a.);
2. Ko posjeduje više od jedne putne isprave iste vrste (član 4.);
3. Ko lažnim i obmanjujućim podacima ishoduje od nadležnog organa izdavanje putne isprave ili vize (član 23.).

Za prekršaje iz stava 1. tač. 1), 2) i 3) ovog člana može se izreći zaštitna mjera oduzimanja putne isprave, odnosno zaštitna mjera zabrane izdavanja putne isprave do dvije godine.

Za pokušaj prekršaja iz stava 1. ovog člana počinitelj prekršaja kaznit će se novčanom kaznom do 200 KM.

Član 25b.

Novčanom kaznom od 300 KM do 500 KM kaznit će se za prekršaj:

1. Ko svoju putnu ispravu da drugome da se njome posluži ili se tuđom putnom ispravom posluži kao svojom (član 23.);
2. Ko bez odgađanja ne prijavi nadležnom organu nestanak putne isprave ili njeno pronalaženje (član 19a.).

Član 25c.

Prekršajni postupak iz prethodnih članova vodit će se u skladu s odgovarajućim entitetskim propisima iz ove oblasti."

Član 14.

Član 30. mijenja se i glasi:

"Putne isprave izdate do dana stupanja na snagu ovog zakona važit će do roka naznačenog u toj putnoj ispravi".

Član 15.

Članovi 14. i 15. Zakona o izmjenama i dopunama Zakona o putnim ispravama Bosne i Hercegovine ("Službeni glasnik BiH", broj 19/01) brišu se.

U tekstu Zakona o putnim ispravama Bosne i Hercegovine riječi: "Ministarstvo civilnih poslova i komunikacija" zamjenjuju se riječima: "Ministarstvo civilnih poslova".

Član 16.

Ovaj zakon stupa na snagu osmog dana nakon objavljivanja u "Službenom glasniku BiH", a objavit će se i u službenim glasilima entiteta i Brčko Distrikta Bosne i Hercegovine.

PSBiH broj 108/04
12. oktobra 2004. godine
Sarajevo

Predsjedavajući
Predstavničkog doma
Parlamentarne skupštine BiH
Martin Raguž, s. r.

Predsjedavajući
Doma naroda
Parlamentarne skupštine BiH
Goran Milojević, s. r.